

## EDWARDS, JOHN ('Meiriadog'; 1813 - 1906), bardd, llenor a golygydd

**Enw:** John Edwards

**Ffugenw:** Meiriadog

**Dyddiad geni:** 1813

**Dyddiad marw:** 1906

**Priod:** Elizabeth Edwards (née Watkin)

**Rhyw:** Gwryw

**Galwedigaeth:** bardd, llenor a golygydd

**Maes gweithgaredd:** Eisteddfod; Llenyddiaeth ac Ysgrifennu; Barddoniaeth; Argraffu a Chyhoeddi

**Awdur:** David Jenkins

Ganwyd yn Llanrwst, ac yn yr ysgol ramadeg yno y derbyniodd ei addysg cyn bwrw prentisiaeth fel argraffydd. Dangosodd dudddiadau llenyddol yn gynnar, a rhwng 1835 a 1860, yn arbennig, ymddangosodd llawer o'i farddoniaeth yn *Seren Gomer*, *Y Dysgedydd*, *Y Diwygiwr*, *Y Gwladgarwr*, a'r *Drysorfa*. Bu'n byw yn Cefn Mawr, Llanfaircaereinion, Caerdydd, a Merthyr Tydfil, cyn dychwelyd yn 1844 i Lanfaircaereinion lle y priododd Elizabeth Watkin. Yno y treuliodd weddill ei oes. Yr oedd yn Fedyddiwr Campbelaidd taer iawn, ac yn Rhyddfrydwr digymrodedd. Ystyrid ef yn ei ddydd yn awdurdod ar ramadeg a chystrawen Cymraeg, ac yn feistr ar reolau cynganedd. Bu'n llwyddiannus iawn fel cystadleuydd eisteddfodol, gan ennill nifer o gadeiriau. Yr oedd hefyd yn feirniad poblogaidd. Bu'n olygydd *Yr Hyfforddwr* am gyfnod (o 1852), a'r *Llusern* o 1858. Bu farw 24 Gorffennaf 1906 yn 93 mlwydd oed. Cyflwynwyd ei lawysgrifau i'r Llyfrgell Genedlaethol yn 1926.

### Awdur

Dr David Jenkins, (1912 - 2002)

### Ffynonellau

*Bye-Gones, relating to Wales and the Border Counties*, 1906, 275

T. M. Jones, *Llenyddiaeth fy Ngwlad* (1893), 103, 105

*Rhestr gyda nodiadau byrion, o Enwogion Cymreig o 1700 i 1900* (1908)

NLW MSS 5950-73

### Darllen Pellach

Erthygl Wikipedia: [John Edwards](#)

### Dolenni Ychwanegol

Wikidata: [Q20565356](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

